

Zeitschrift: Berner Zeitschrift für Geschichte und Heimatkunde
Herausgeber: Bernisches historisches Museum
Band: 29 (1967)

Artikel: Mit Trummle und mit Pfyffe : Schulfunk-Hörfolge
Autor: Lerch, Christian
DOI: <https://doi.org/10.5169/seals-244808>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 21.08.2025

ETH-Bibliothek Zürich, E-Periodica, <https://www.e-periodica.ch>

MIT TRUMMLE UND MIT PFYFFE

Schulfunk-Hörfolge von Christian Lerch

Von Radio Bern gesendet 1945 und 1961

Personen: Ansager

Kaspar, ein älterer Söldner

Hans, Sohn eines Kleinbauern

Uli, Zimmergeselle

Weibel

Italienisches Büblein

Stimme eines Reisläufers

Zeit: um 1500

Erstes Bild

Ansage: In einer stürmischen Frühlingsnacht. Eine einsame Feldscheune in einem abgelegenen Graben.

Kulisse: Regen. Pfeifender Wind. Mühsam stapfende Tritte.

Hans: (atemlos, halblaut) So — ändtige. Ha gmeint, i fing das Schüürli nid. Stockfeister — u settigs Wätter! — Wie het jetz der Chasper neue gseit? Zersch brüele wie ne Nachschutz. — Derna a d'Türe topple: einisch, zweimal, einisch. — De derna ds Paßwort säge, we öpper fragt. Also!

(Ruf des Nachtkauzes)

Jetz topple.

(Ein Schlag, zwei Schläge, ein Schlag. Dann kurze Stille. Türe knarrt)

Kaspar: (barsch) Wär da? Paßwort!

Hans: Gruenbirechrättli!

Kaspar: Jä so — du wärish Brüschi-Hänseli. Yne! Aber mach hübscheli! (Schleichende Tritte)

Hans: Fyster da inne — mi gseht ja nid nasesläng!

(Türe knarrend zu. Wetterlärm fast aus)

Kaspar: Jä jetze. Mir cheu nid Liecht mache we me nid weis wär alls zuehetrappet.

Hans: Aber bi settigem Wätter —

Kaspar: Pscht — nid eso lut! Grad bi settigem Wätter cha me nie wüsse. — Ig weis drum öppis! — Wodüre bisch cho?

- Hans: He, där d'Weid uf, em Zuun nah — derna hinger em Lingehoger
düre — u düre Wolfsgraben ab —
- Kaspar: Hesch e fyni Nase gha, bisch nid über ds Grabebrüggli! Dert
wärisch grad schön em Weibel i d'Fingere glüffe. Dä tuet dert
passe, mit zwene Chnächte — u mit sym böse Hung.
- Hans: Wohär weisch du das?
- Kaspar: I weis es ömel. Weder für dää bin i no lang schlaue gnue. Dä soll
mer nid Freud ha! En alti Chriegsgurgle wien ig fingt gäng öppe
der Rank. U dihr angere wärdit hoffetlig nid Löhls gnue sy für
nech la z'verwütsche. Süscht: Mira de!
- Hans: I hätte de scho Sorg. — Daß sie sövel scharpf sy, über gnädige
Herre, z'Bärn inne! — Weisch, i ha de wäger no nes Rüngli
gwärweiset, dä halb Tag. We's halt däwä scharpf verbotten isch!
- Kaspar: Die hei scho mängs verbotte, die gnädige Herre z'Bärn. Nid nume
ds Reislaufe. U ds Reislaufe o scho meh weder einisch. — P'hü!
I chehre nid d'Hang um wägdessi. Bi afe gar mängisch derby gsi.
— Soo, aber jetze sötti mer drahi chönne. I erwarten öppe ihrere
dryzähe oder vierzähe. Die zaagge jetzen ömel o lang! Mir wei
d'Türen e chly uftue — so ghört me's ömel de, we d'Nachtchutze
brüele!
- (Tür geht auf; draussen leiserer Regen, schwächerer Wind. Eine
Turmuhr in der Ferne schlägt neun)
- Hans: Du, Chasper — i wott — i ha mi jetz doch no angers bsunne. I
lah's jetze doch schier lieber la sy.
- Kaspar: Sturm was de bisch! Nimm di zäme ustell mer druus! Weisch —
- Hans: Jä, i ha ömel de gäng no d'Weli.
- Kaspar: Nei, du hesch äbe nümme d'Weli.
- Hans: Wohl hani!
- Kaspar: Nei, hesch se nümme! So sicher daß de drusstellsch, so sicher ver-
nimmt morn der Weibel, du sygisch hie gsi, u für was. De chunsch
de a Schatte, wen es de nid no heißt: Gring ab!
- Hans: I tät gwüß gschyder deheime blybe.
- Kaspar: Los, Hänseli — was hesch de guets, deheime? Wärche, u di ab-
schinte, u bösha, u dy Alte gäng nume brummle — u gäng schier
hungerig vom Tisch! Isch es nid eso?
- Hans: Hö — albeneinisch wohl.
- Kaspar: Henu, also! U jetz rächne dergäge — mir göh zum Herzog vo
Meiland. Uh, dä het Gält! Dert chaisch Gält verdiene, du hättisch
vorhär gmeint, nid uf der ganze Wält syg sövel Gält binanger! U
de es lustigs Läbe chasch ha, i säge der, es lustigs Läbe! Du weisch
ja gar nid was es lustigs Läbe isch!
- (Ruf des Nachtkauzes)
- Aha, da chunt öpper! Türe zue! Müüselistill!

(Kurze Pause, dann klopft es einmal, zweimal, einmal. Türe knarrt)

- Kaspar: Wär isch da? Paßwort! — Paßwort! Oder es git chalts Yse!
Uli: Channebire — eh — ehmm — Gruenbirechrättli!
Kaspar: Mhm, ds Paßwort weis er. Aber d'Stimm kennen i nüt. (*barsch*)
Wäm bisch?
Uli: Ui — lah mi gah!
Kaspar: Nei, zersch wott i wüsse wäm de bisch!
Uli: He, der Byfang-Ueli bin i.
Kaspar: I kenne ke settige.
Hans: He wohl, der Zimmergsell — lah ne gah, Chasper, d'Sach isch scho rächt!
Kaspar: So chum yche! Aber es kes luts Wort, hesch ghört! Wär het der gseit, du söllisch dahäre cho?
Hans: He, ig han ihms gseit.
Kaspar: Für was?
Hans: He, du hesch doch gseit gha, wenn i öppe no ne gsunge, starche junge Purscht wüßt —
Kaspar: Also mira. — Für was wotsch furt?
Uli: Muesch du das wüsse?
Kaspar: Däich wohl mues i. La gseh, red use!
Uli: He wenn i ja em Herr Pfaarer syner junge Bäumli soll umgmacht ha!
Hans: Aber das isch doch nid wahr!
Uli: Chasch ga säge, nid wahr. We sie doch der Gertel i üsem Schopf inne fungé hei — u dä Gertel het e Lücke use — u grad ds glychlige Zeiche isch a allnen abghounige Bäumli. Ha lang chönne säge, dä Gertel syg nid üse, i heig dä no nie gseh. Der Weibel bhouptet glych, es syg mi gsi. U all anger Lüt. Wil drum der Pfaarer äi Tag mit mer balget het, wäge öppisem — jetze säge sie, i heig wölle Raach näh.
Kaspar: Es isch auwä scho ds Gschydste wo de chasch mache, we de mit üs chunsch. Pfaarer u Weible u settig hei gäng rächt. Oder wotsch warte bis sie di hingere tue?
Uli: Es isch drum — wäge Müettin. Wär soll ihm de wärche — u d'Sach mache? U de my Meister? All Häng voll z'tüe het er, u kener Lüt! Alls louft i Chrieg!
Kaspar: Jä das mues me hütigstags — ga reisloufe we me ring zu öppisem wott cho. Hütigstags wo all Chünige u Fürste Schwyzer tue dingé für ihri Chriege. Wil mir drum die beste Chriegsmanne sy vo der Wält!
- (Ruf des Nachtkauzes, zweimal. Dann entfernt Hundegebell)*
Pscht — da isch öppis nid i der Ornig! Blybit da inne, u machit

mer e ke Mux! — I mues hurti ga luege was los isch!
(Türe leise knarrend zu. Kurze Pause)
Uli: (flüsternd) Du, Hans, i chume de nid mit euch. I wott nid mit
däm Chasper. I schüüche ne.
Hans: He, das geit de nid gäng eso wie hinecht.
Uli: I ha drum scho gar mängs ghöre säge. Wenn er albe hei chöm, so
wöll er nume guet läbe u guet ässe, u nüt wärche. U tüej alben-
einisch wüest wie ne Sydian. U de syg er gäng gar e böse mit sym
Aetti. Gschlage heig er ne o scho. U no öppis: du, i gloube dä
überchunt Gält für jede Ma, won er uf Meiland abe bringt. I gah
nid mit ihm. Daisch e Möntscheverchäufer!
Hans: Jä — wohi wotsch de? Du hesch doch gseit, du müeßisch furt!
Uli: Däich ga Frankrych. I weis eine wo dert häre geit. U das gfiel
mer besser weder mit em Chasper.
Hans: Jä, los — wenn i di wär...
(Draußen drei Nachtkauzrufe. Dann Hundegebell, näher)
Kaspar: (kommt zurück, eilig, flüsternd) Furt, furt, tifig furt! Dert zum
Pfäister us! Tifig, tifig, der Weibel chunt! Dür e Grabe hingere,
über d'Grabeflüeh ab, dür ds Wasser düre, u änefür grediufe. De
verwütsche sie nis nid! Hurti, hurti!
(Man hört sie fliehen. Hundegebell ganz nahe)
Weibel: (draußen) Ringgi, schwyg! Bänz, hiedüren um ds Schüürlí um!
Heiri, änädüre! I gah zur Türen y! (Türe knarrt) Waas — isch
jetz das? Scho usgfloge? Die hei öppis gmerkt! Tifig der Ringgi
a d'Chötti — un em Gspuur nah! Bänz, Heiri, loos!
*(Hund bellt laut. In der Ferne Kauzenrufe, mehrmals. Fernes
Hohngelächter. Sturm und Regen setzen wieder ein)*

Zweites Bild

Ansage: Schöner Spätsommerabend in der Nähe eines oberitalienischen
Dorfes. Kaspar und Hans sind auf Patrouille; sie schleichen durch
einen Rebberg.
(Campanilegeläute in der Ferne. Vogellied)
Hans: Du, Chasper, i rächne, mir chönni säwft ume umchehre. Da isch
doch niene nüt umewäg, vom Find.
Kaspar: Muesch mi allwä prichte, du! Vilicht sy re grad da i däm Dörfl
nide. Es tät mi nüt verwungere wenn es no hinecht losgieng. —
Wenn i nume nid eso unerchannte Hunger hätt! U Durst! Dä Durst!
U da die Trübel sy ja no lang nid ryf!
Hans: Durst han i o. U Hunger schier no meh.
(Näherkommende Kinderstimme, singt:)

L'inverno l'è passato, l'Aprile non c'è più,
E ritornato è Maggio al canto del cucù.
Cucù cucù, l'Aprile non c'è più
(*Während das Kind die Strophe zu Ende singt:*)

Kaspar: Lue, Hans, dert chunt üses Znacht!
Hans: Was — üses Znacht?
Kaspar: Däich wohl — dä Bueb dert het's im Chörbli!
Hans: Daisch jetz allwä für üs!
Kaspar: Wohl, für üs! Lue de nume! Häb der Gring abe!
Knabe: (*nahe*) Cucù, cucù, l'Aprile non c'è più —
Kaspar: Häre mit däm Züög!
Knabe: Oh no, no, prego, Signor, c'è la cena per il babbo!
Hans: Was seit er?
Kaspar: Wotsch la gah, Schnuderbueb, oder es git Chläpf!
Knabe: (*schreiend*) Mamma, mamma, mi hanno preso il corbellin!
Hans: Was het er gseit, vori, zersch?
Kaspar: He was ächt — da i däm Chörbli syg sym Alte sys Znacht!
Knabe: (*etwas entfernt*) Mamma! Mammina!
Hans: Los, du, gib ihm's ume! He, Buebli, du! Chum, chasch es umeha!
Wenn i jetz nume italiänisch chönnt!
Kaspar: Dumms Züög! Lah du dä nume la springe, dä Pääggibueb! — Oder
wart, i pängglen ihm e Stei a — de schwygt er de scho!
Hans: Mach's nid, gäll!
Kaspar: Wohl, wen er nid schwygt!
Knabe: (*in der Ferne*) Mamma, quelli soldati svizzeri mi hanno preso il
corbellin!
Kaspar: Wotsch ächt schwyge!
Hans: Nid, nid! Nid e Stei!
(*Man hört einen geworfenen Stein fallen*)
Kaspar: Schläichti Preichi!
Hans: Gottlob! Dä arm Büebu!
Kaspar: Weisch was — gang du hei u gränn, u hang der Muetter a Scheu-
bezopfe!
Hans: I gieng öppe gärn hei, wen i no dörft!
Kaspar: A pa, im Chrieg cha me nid eso sy, süsch chunt me zu nüt! —
I ha Durst, es putzt mi schier. (*Trinkt*) Mmm! Besser weder e
wältschi Predig! Wotsch o? Oder weisch was, nimm afe Aesigs —
was isch alls im Chörbli? Chäs, u wyßes Brot, u Salamiwurst —
la gseh, nimm doch!
Hans: I ma nid!
Kaspar: Bisch e längwylige Muggigring, daß es nume weisch! Mira! Chasch
de luege wie das geit, hinecht, dryschlah un e lääre Mage! —
Henu, wär nid wott, het gha!

Hans: (*in anderem Tone*) Du, Chasper, lue dert nide! Dert isch eine i de Studen inne — auwä eine vom Find!

Kaspar: (*interessiert*) Wo? Zeig!

Hans: Dert vo der rote Muur schreeg obsi ubere — gsehsch, jetz isch er grad bi däm feistergrüene Bäumli —

Kaspar: Ja, i gseh ne — grad jetze het er si ganz abeglah — jetz het er der Gring uf u glüüßlet gäge hieume. D'Chappen ab — u da hinger ds Räbloub! Soo! — I wott grad öppis wette, das isch e Franzos!

Hans: Jä, u jetze?

Kaspar: (*spottend*) Jä — u jetze? Was ächt? Ga umlah müeße mer ne! Aer oder mir — eitwäders!

Hans: Ja — aber...

Kaspar: Nüt ja aber! Jetze tüüßelisch du schön süferli da em Müürli nah abe, tychisch nahär de Saarbäum nah dür e Straßegrabe, änevür hesch hottume bis zu der Studerete zueche — machsch daß er di nid merkt — u nahär uf ne! Oder i syg de ehnder, änädüre! Aber tifig!

(*Kurze Stille. Campanilegeläute. Vogelliéd*)

(*Ganz nahe lauter, schmerzerfüllter Aufschrei*)

Kaspar: So — dä hätt sy Sach!

Hans: (*kommt gelaufen, entsetzt*) Chasper, was hesch du gmacht? Das isch ja der Ueli! (*leidenschaftlich*) Ueli, Ueli!

Kaspar: Tonnerli doch o — das isch mer jetze — aber für was geit dä zu diesne?

Hans: Ueli, Ueli! Los doch o! Säg doch öppis!

Kaspar: Wenn er no chönnt!

Hans: (*aufschreiend*) Ueli!

Kaspar: Bisch verrückt, däwä ga brüele? We der Find auwä ganz naach isch! Eh weder nid het dä chly Bueb vori der Alarm ggäh mit sym Päggge — hätt i nume besseri Preichi gha mit mym Stei!

Hans: Ueli — kennsch mi nid?

(*In der Ferne Trommelwirbel. Hörner*)

Ueli: Wär isch da? Wär het mi gstoche? Du — Hans?

Hans: Nei, nid ig! Der Chasper! Wo isch er jetz! Nümm um e Wäg!

Ueli: Hans — mueß i stärbe?

Hans: I weiß es nid. (*Schluchzt*) I wett der ja so gärn hälfe, Ueli, arme Ueli — wenn i nume wüßt wie!

Ueli: Seisch de — mym Müetti — es syg nid mi gsi — das — mit de Bäumli!

Hans: I weiß wär's gsi isch. Grad sit jetze weiß i's. Aber das mueß mer de no i d'Ornig, zell druf!

(*Trommeln und Hörner näher*)

Ueli: Un em Pfaarer säg's de o — un em Weibel. Gäll. U los — im Sack han i no zweu Goldstück. Bring die mym Müetti.
 Hans: Ja — aber gäll — du stirbsch mer nid!
(Trommeln nahe. Soldaten kommen im Eilschritt)
 Kaspar: (*barsch*) La gseh, Hänsu, chum, vüre, vüre! Häb uf — jetz hei mer nid derwyl, is mit de Gstorbnige z'versuumme!
 Hans: Aber er läbt ja no!
 Kaspar: Stürm mer nid! Chum du jetze!
(Soldaten ziehen in strammem Schritt vorbei. Trommelwirbel, laut. Ausblenden)

Drittes Bild

Ansage: Stürmischer Spätherbstnachmittag auf einem einsamen Alpenpasse im Wallis. Kaspar und Hans auf der Heimkehr.

 Kaspar: La gseh, Hans — mach, mach! Numen öppe no ne Halbstung, de sy mer dobe. Aenenabe geit's de ringer.
 Hans: I ma drum nümm. Afe dä Schnee. U vom Wäg gseht me nüt. Un ig däwä Fieber. U ds Härz chlopfet mer. U der Chopf tuet mer eso weh. — E chly abhocke.
 Kaspar: Chasch sicher sy, we mer abhocke, so stöh mer nümm uf. U du wirsch doch hei wölle!
 Hans: Däich wohl wott i hei! I ha ja em Peterli, mym Brüederli, ver-sproche, i woll ihm de öppis chraame. U dä wartet jetz druf. (*Bitter*) Schöne Chram das! Nume no ei Hang!
 Kaspar: Aber ömel die rächti —
 Hans: I cha ja nie meh e Sägetze oder e Charst i d'Fingere näh! Mira. Säg mer was d'witt; i hocken ab. Schlafe! Schlafe!
 Kaspar: Aber es gieng ja nume no ne Halbstung, bis ufe. E Stung änefür nide isch e Hütte — dert cheu mer is wärme — dert chasch de schlafe bis gnue. Alee, hüpp, chumm jetz!
 Hans: (*schon wirr*) Gält — hani wölle verdiene. Gält hätti jetz. I bi e ryche Pursch. Lue da, Peterli, wieviel Gält! Wen es nume nid eso schwär wär, das Gält!
 Kaspar: Himmelärde, was soll i o afah? Aleini da obe, mit emene tot-chranknige Gspane — u jetz faht dä mer no a verstört rede. Du himmlischü Güeti — er het ja gar e kes Gält! Nid e Pfennig het er — un ig o nid! — Hans, erwach! Hesch ghört!
 Hans: Weisch, Peterli, mir Schwyzer sy die sterchste u beste Chriegs-manne uf der Wält. Jä gäll!
 Kaspar: Chum jetze! Mir wei hei! Hesch ghört, hei!
 Hans: Lue da, Peterli, was i der gchramet ha! Trübel! Uh, die sy süeß!

Chum nume, chum, i nime der dys Chörbli nid. Muesch nid Angst ha. Der Pfaarer balget nid. Du hesch ihm ja syner Bäumli nid umghoue. Der Gertel isch em Chasper syne!

Kaspar: Himmelärde! Es settigs Eländ!

Hans: Peterli — förchtisch mi gäng no! Muesch nid — lue, i chume zueder!

Kaspar: Wo wotsch hi, Hans! Nid dertdüre, nid dertdüre, halt, halt!
(*Gellender Aufschrei*)

Soo. Jetz isch er abetrohlet. (*Sturm pfeift stärker*) Gäß der Gott — die ewigi — Ruehw. — Das o no. Deheime würde sie de säge — i heig ne — abegstoße. Das würde sie. I weiß es. — Liebgott, i verspriche der: wenn i heichume, dingen i nie meh z'Chrieg!
(*Sturm heult auf*)

Stimme: (in einiger Entfernung) Ho-oh! Ho-oh!

Kaspar: Das isch nid der Hans... das isch öpper anger, da wyter oben am Bärg... Ho-oh! Ho-oh!

Stimme: (etwas näher) Isch öpper da?

Kaspar: Ja — hie!

Stimme: Gottlob! U de no ne Schwyzer! I ha scho gmeint, i chöm nümme läbig dervo. — Wo bisch? I gseh schier nüt!

Kaspar: Da hie. Häb Sorg! Nid gredi düre, süsch trohlisch abe!

Stimme: I troue mer nümme wyter. Chum hilf mer!

Kaspar: I chume — blyb stah wo de bisch! — Soo. Reck mer d'Hang — nei, hiedüre — häb Sorg! Jeetze!

Stimme: Gottlob u Dank — du hesch mer ds Läbe grettet.

Kaspar: Wohi wotsch?

Stimme: Ga Meiland abe.

Kaspar: Was ga mache?

Stimme: Ga z'Chrieg dinge.

Kaspar: Jä, der Herzog vo Meiland nimmt jetz kener Chriegschnächte. Der Chrieg isch uus. Der Herzog het verspielt.

Stimme: So gahni halt an es angers Ort. I finge scho ne Meister. E Schwyzer bruucht nie lang z'frage. — U du — wotsch o dert abe?

Kaspar: Nei — i chume grad vo dert. Eigetlig hätt i jetze hei wölle. Weder was treit's mer ab? Weisch was — soll i mit der cho? I weiß der Wäg — u cha d'Sprach — u bi afe mängisch derby gsi.

Stimme: Das wär mer rächt. Chunsch? Wotsch my Gspane sy?

Kaspar: Söll i ächt? — He ja, das git wolöpppe nes lustigs Fahri! Es giltet — i chume!